

21 MAR 1999

Perhimpunan-Markah

PAS TEWAS 6-0 DI STADIUM DARUL AMAN

ALOR SETAR, 21 Mac (Bernama) -- Papan markah di Stadium Darul Aman di sini biasanya memaparkan jaringan pasukan bola sepak, tetapi pada perhimpunan rakyat secara besar-besaran di stadium itu malam ini ia memaparkan markah lain.

Kali ini papan markah kecil yang diperbuat sendiri oleh peserta perhimpunan itu, dihasil dari papan yang diwarnakan latar belakang hijau, memaparkan angka 6-0.

Juruacara majlis, Aziz Desa ketika mengumumkan mengenai papan markah itu berkata ia adalah menunjukkan kekalahan Pas pada pilihan raya umum di Sabah baru-baru ini.

Pas tewas kesemua enam kerusi yang ditandinginya pada pilihan raya itu.

Terdapat kira-kira enam papan markah itu yang turut menarik perhatian Perdana Menteri Datuk Seri Dr Mahathir Mohamad dan beliau mencadangkan supaya Pas, yang sekarang ini sibuk menaikkan bendera partinya di merata tempat, supaya turut sama menaikkan bendera 6-0 itu.

"Dekat dengan pilihan raya umum ini, Pas bekerja keras menaikkan bendera mereka, kita minta mereka turut naikkan bendera 6-0 di depan kita ini," katanya sambil disambut dengan sorakan para hadirin.

Perhimpunan bersama rakyat pada malam ini disifatkan oleh Dr Mahathir sebagai yang yang terbesar pernah dihidirinya dan beliau juga berbangga kerana semua kaum turut hadir bersama.

Dianggarkan kira-kira 50,000 orang menghadiri perhimpunan itu.

Kain rentang yang memaparkan sokongan terhadap Dr Mahathir menghiasi stadium. Antaranya, sepanduk yang berbunyi Rakyat Siam Tetap Setia Kepada Perdana Menteri Datuk Seri Dr Mahathir Mohamad, Mahathir Boleh dan PM Jangan Undur.

Majlis itu diserikan dengan bacaan sajak "Perjuangan Yang Belum Selesai" oleh Aziz Desa. Sajak itu ciptaan Dr Mahathir.

Kemudian diikuti dengan persembahan penyanyi N.D Lala dan kumpulan Nasyid Firdaus serta sebuah kumpulan dari Indonesia, Sakinah Group yang mempersembahkan irama padang pasir.

Dr Mahathir berkata perhimpunan secara aman seperti malam ini adalah keistimewaan rakyat Malaysia dan tidak banyak negara boleh menikmati keistimewaan seperti itu.

-- BERNAMA

MZM ZB